

Dª ROSA ANA PRADA QUEIPO, SECRETARIA DO CONCELLO DE AMES NA PROVINCIA DA CORUÑA

CERTIFICO: QUE O PLENO DESTE CONCELLO LEVOU A CABO SESIÓN ORDINARIA O 12 DE XANEIRO DE 2012, DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE.

ACTA DA SESIÓN ORDINARIA LEVADA A CABO POLO PLENO DO CONCELLO O DÍA 12 DE XANEIRO DE 2012.-

No Salón de Sesións da Casa do Concello de Ames, ás vinte horas (20:00) do día 12 de xaneiro de 2012, reúnese o Pleno do Concello en sesión ordinaria de primeira convocatoria, baixo a presidencia do Sr. alcalde don **Santiago V. Amor Barreiro** e coa asistencia dos/as señores/as concelleiros/as seguintes:

Grupo municipal Popular	Grupo municipal Socialista	Grupo municipal do BNG
Mª Dolores Fernández Álvarez Manuel Ferreiro Santiago Ramón García Argibay María González Gómez Mª Eugenia Martín Vicente Emilio Martínez Carballeira Bernardo Moar Míguez Alfonso Rey López Alfredo Taboada Alvelo Mª Carmen Verde Leboráns	Patricia Conde Lois José Francisco Doval Galán Carmen Fraga Crespo Isabel González Cancela José Manuel Miñones Conde	María Pilar Candocia Pita Xosé Anxo Doval Rey Susana Mallo Redondo

Non asisten pero xustifican a súa ausencia a concelleira do grupo municipal do BNG dona Olalla Alvite del Río e o voceiro do grupo municipal socialista don Carlos A. Fernández Castro.

Asiste o señor **interventor** don José Antonio Rueda de Valenzuela.

Actúa como **secretaria** a titular da Corporación dona Rosa-Ana Prada Queipo.

A) PARA DAR CONTA:

Punto primeiro.- Dar conta ao Pleno da Corporación dos decretos ditados pola Alcaldía dende a última sesión plenaria ordinaria.

O señor alcalde don **Santiago V. Amor Barreiro** informa á Corporación que os decretos ditados pola Alcaldía dende a última sesión plenaria ordinaria estiveron a disposición de todas/os as/os concelleiras/os na Secretaría Xeral, engadindo que o acceso aos decretos é libre para todas/os as/os concelleiras/os en calquera momento na Secretaría Xeral do Concello, e que con ocasión da convocatoria dos plenos ordinarios o que teñen a súa disposición é o libro oficial, en papel timbrado e numerado, ademais dos duplicados existentes nos distintos departamentos do Concello.

Informa o señor alcalde que aínda quedan pendentes algúns decretos de índole económica que serán remitidos proximamente á secretaria xeral, tal e como reflicte unha nota interior do señor interventor, presente no expediente.

B) PARA DELIBERACIÓN E ACORDO:

Punto segundo.- Aprobación se procede de actas anteriores.

O señor alcalde don **Santiago V. Amor Barreiro** somete a consideración da corporación tres actas, as correspondentes ás sesións ordinaria de 24 de novembro, extraordinaria de 12 de decembro e extraordinaria e urxente de 23 de decembro de 2011, preguntando a continuación se hai algunha intervención ao respecto das mesmas.

Intervén polo grupo municipal do BNG o concelleiro don **Xosé Anxo Doval Rey** para dicir que no punto décimo segundo da acta de 23 de decembro o BNG fixo unha solicitude de retirada da súa alegación motivada nunha aclaración feita no transcurso

da comisión informativa, o cal se debería reflectir na acta, porque de non ser así non se entendería o voto a favor do seu grupo municipal nese punto.

Esta apreciación é aceptada pola señora secretaria xeral.

O pleno da corporación por unanimidade dos seus membros presentes presta aprobación á acta correspondente á sesión ordinaria de 24 de novembro de 2011.

O pleno da corporación por unanimidade dos seus membros presentes presta aprobación á acta correspondente á sesión extraordinaria de 12 de decembro de 2011.

O pleno da corporación por unanimidade dos seus membros presentes presta aprobación á acta correspondente á sesión extraordinaria e urxente de 23 de decembro de 2011, co engadido da precisión feita polo señor Doval Rey.

Punto terceiro.- Proposta da xunta de voceiros de modificación de acordo plenario de periodicidade das sesións ordinarias do Pleno.

(.....)

Rematadas as intervencións o pleno da Corporación por unanimidade dos seus membros presentes presta aprobación á Proposta da xunta de voceiros de modificación de acordo plenario de periodicidade das sesións ordinarias do Pleno no sentido de que os plenos ordinarios de agosto e decembro se celebren o último xoves do mes correspondente ás 20:00 horas, como ocorre cos restantes plenos ordinarios.

Punto cuarto.- Toma de coñecemento polo Pleno da renuncia do concelleiro don Carlos Antonio Fernández Castro.

(.....)

Rematadas as intervencións o pleno da Corporación toma coñecemento da renuncia ao cargo de concelleiro de don Carlos Antonio Fernández Castro, renuncia presentada por escrito mediante rexistro de entrada 24933 de 30 de decembro de 2011 e que non ofrece dúbidas da súa autenticidade.

Tomado coñecemento da renuncia o pleno acorda solicitar á Xunta Electoral Central a expedición de credencial a favor do seguinte candidato da lista na que se produciu a vacante (partido dos socialistas de Galicia-partido socialista obreiro español) que resulta ser don Leonardo Pena Couceiro, o cal terá dereito a tomar posesión no primeiro pleno que se celebre unha vez recibida a credencial e previo cumprimento dos requisitos legalmente establecidos.

C) PARA CONTROL DO GOBERNO:

Punto quinto.- Moción de proposta do grupo municipal do BNG sobre a elaboración dun plan de equilibrio económico financeiro.

O señor alcalde cede a palabra ao grupo propoñente da moción, intervindo o concelleiro don **Xosé Anxo Doval Rey**, que di: A moción que presenta hoxe o BNG ten a súa orixe no último pleno celebrado, no que o grupo de goberno se comprometeu a elaborar un plan de equilibrio económico financeiro. Tamén en plenos anteriores, e mesmo hoxe, tentan chegar a acordo cos grupos da oposición, e nese sentido de talante de colaboración e tentando aportar o que o BNG poda para mellorar a xestión do concello, presentamos esta moción, que o que pretende é que o pleno se manifeste sobre unha serie de condicionantes que ao noso entender debería ter ese plan económico financeiro, que loxicamente o que debe pretender é -no caso de que os ingresos non cheguen, dada a situación económica non só deste concello senón da maior parte dos concellos vai ser así e os gastos que ate agora se estaban tendo probablemente sexan excesivos- equilibrar as contas. A proposta pretende que ese equilibrio non se faga a costa de subir dun xeito indiscriminado taxas e impostos e que se faga dunha maneira que afecte en función das posibilidades das veciñas e veciños que teñan que pagalos. Que se busque aumento de aportacións

doutras administracións para lograr ese equilibrio, e, na redución dos gastos, que estes non afecten aos servizos básicos e de benestar que tanto teñen caracterizado ao noso concello.

En todo caso, de afectar ao capítulo 1 e ás persoas, que non se faga con cargo a prazas ocupadas. O BNG pretende, na medida do posible, non só que se manteñan os servizos, senón tamén que se tente facer dunha maneira mancomunada con outros concellos no que sexa posible.

Por último, e dado que este goberno dende a súa toma de posesión está levando a cabo unha serie de medidas de aumento de prezos públicos e de taxas que teñen como finalidade tentar equilibrar esas contas, e tamén, ate onde nós sabemos, está negociando coa representación sindical unha serie de recortes tanto de persoal como de servizos, pediríamos tamén que o pleno adopte a decisión de que a proposta que está enriba da mesa se suspenda e non se leve a cabo, en razón de que cando un está planificando algo non sabe cales son as conclusións desa planificación, e por tanto non ten sentido que se estean adoptando medidas que poden ser, ou poden non ser, o resultado final da planificación.

Non me vou estender mais neste momento, creo que explicando cal é a nosa intención, que é en todo momento de colaboración e tamén de aclaración sobre as medidas que o goberno está a adoptar, é suficiente, e nunha segunda intervención falaría doutras cuestións de ser necesario.

O señor alcalde don **Santiago V. Amor Barreiro** abre unha primeira quenda de intervencións cedendo a palabra á concelleira do grupo municipal socialista dona **Patricia Conde Lois**, que di: O grupo municipal socialista, á vista desta moción na que se fan unha serie de declaracións de principios, de ideas fundamentais para o desenvolvemento deste plan de equilibrio económico financeiro que compete ao goberno, en principio comparte en xeral as ideas, pero con matizacións nalgún dos apartados. Queremos facer unha proposta *in voce* en tres apartados.

No primeiro, cando se fala de que un aumento da presión fiscal debe ir acompañado de medidas de progresividade e fraccionamento dos pagos, o grupo municipal socialista entende que o aumento da presión fiscal debe ser como a última medida dentro do plan, é dicir, que se acuda ao incremento da presión fiscal na menor medida posible. Nese sentido, a fin de que quede claramente explicitado no parágrafo, nos gustaría que quedase reflectida unha engádegas que diga “de ser o caso debe ir acompañada de medidas de progresividade e fraccionamento dos pagos”.

No seguinte apartado, o cuarto, no que se fala de aumento de taxas e prezos públicos, tamén entendemos que dentro do plan de equilibrio que haxa que facer, propoñemos incluír a seguinte proposta de engádegas: “de ser o caso acudir ao aumento das taxas e prezos públicos”, na medida de que tendo en conta a situación de crise actual ha de repercutirse o menos posible na cidadanía, o que para nós debe ser unha das últimas medidas.

No punto sete, cando se fala de que de ser necesario acometer reducións no capítulo 1 non se fará con cargo a prazas da RPT ocupadas, entendemos que redactada así deixa aberta ao goberno a posibilidade de que naquelas prazas que están agora ocupadas pero non están incluídas na RPT podan producirse reducións. Nos gustaría que a redución non se producise en ningunha praza ocupada incluída na RPT nin nas ocupadas fóra da RPT. A nosa proposta sería “de ser necesario acometer reducións no capítulo 1 non se fará con cargo a prazas ocupadas”, garantindo así o compromiso do goberno de que non se produciría ningunha redución de persoal de prazas que quedarían fóra da RPT.

Intervén o concelleiro delegado de Persoal, Reforma Administrativa, Servizos e Urbanismo don **Ramón García Argibay**, que di: Nós temos claro que hai que facer

tanto o plan de equilibrio económico financeiro, o que xa dixemos moitas veces e por outra banda é obrigatorio, e o plan de estabilidade, que probablemente vinculemos de xeito conxunto. Do que se pretende nesta moción moitas cuestións xa as temos plantexado nós, dende o punto de vista tanto do plan económico financeiro como do de estabilidade, pero hai matices que nós, evidentemente, non compartimos. No tema da RPT temos claro que agora mesmo a deste concello está moi desfasada, non garda unha relación directa a realidade dos postos de traballo do persoal do concello co que figura no papel, polo tanto non podemos compartir ese punto. Igual sucede, e iso será tema a tratar no seu momento, coa modificación da RPT e a adaptación da mesma aos postos de traballo, ás condicións, ás características que ten cada traballador neste concello. Iso é algo que temos en asuntos pendentes futuros, como o tema do convenio colectivo, que leva vencido tres anos e que é unha cuestión que debe ir na mesma liña cando falamos dos Recursos Humanos. Este goberno tivo que tomar medidas nestes seis primeiros meses que evidentemente van encamiñadas a garantir, sobre todo e fundamentalmente, os servizos básicos.

Nunhas cuestións chegamos a acordo, como foi no tema das taxas de Bos días cole e Tardes divertidas, noutras non houbo acordo, e a nosa intención agora mesmo está cuberta con esas situacións, polo tanto creo que os axustes que tomou este goberno nestes seis primeiros meses deberían de ser suficientes, e digo *deberían*, polo menos de momento. Hai que ver como evoluciona a economía global, a galega e, por suposto, a do concello, pero en principio deberían ser suficientes, dende logo nós con esa intención o fixemos, e repito, coa intención única e exclusivamente sobre todo de salvagardar os servizos básicos, que temos que garantir dende o grupo municipal, dende o goberno e dende o pleno do concello.

En canto ao que se refire á presión fiscal, no pleno no que se aprobaron as ordenanzas fiscais se conxelaron os impostos, nin sequera se subiu o IPC, polo tanto esa é unha acción de goberno que xa está demostrada, este goberno xa demostrou que non está pola labor de aplicar ningún tipo de subida fiscal. Iso non significa que nun futuro, non sabemos se próximo ou non, o IPC si haxa que volver a subilo, e non como na anterior ocasión, que nin sequera recorremos ao IPC para axustar os prezos dos impostos.

Cremos que esta moción non está acorde coas pretensións deste goberno e por tanto en principio o noso voto vai ser negativo.

O señor alcalde don **Santiago V. Amor Barreiro** abre unha segunda quenda de intervencións cedendo a palabra ao concelleiro do grupo municipal do BNG don **Xosé Anxo Doval Rey**, que di: Estou confuso, porque se moitas destas medidas están recollidas xa no plan que están elaborando, se a RPT está moi desfasada, parece razoable entón para calquera tipo de negociación o negociar unha nova RPT. Se xa tomaron medidas en garantir os servizos básicos, igualmente. Eu ás veces, sinceramente, me da a impresión de que o que lles está custando é rectificar, e o sinto, porque ate o de agora non lles custou, mesmo manifestaron hai non moi moito tempo neste mesmo pleno que cando hai que rectificar o fan. Van contra os principios, o resultado final é o contrario ao que inicialmente propoñen. Hai moitos manuais sobre o que é planificar, un deles se chama *O Marco lóxico* e está adaptado a nivel europeo. Vou falar das súas fases para explicar por que ao final non entendo a súa planificación.

A primeira fase é o análise da situación interna (orçamentos...) e externa: situación económica, as medidas que adopta o Goberno Central, porque está moi ben que vostedes non suban impostos, pero este ano á maioría dos amienses lles van subir o IBI. A planificación é necesaria e é necesario esperar, e deberían tomar nota do que di a Xunta de Galicia. Por exemplo a presidenta da Comunidade de Madrid ao falar do IRPF falaba de ver as medidas que o Goberno do Estado adopta e a partires de aí tomar decisións. Por tanto, planificar tamén significa esperar e ter en conta as situacións externas. Unha vez feito isto hai que establecer uns obxectivos e ao final

adoptar medidas, pero vostedes están adoptando medidas e despois están planificando. Non ten sentido, penso que están cometendo un erro e creo que vostedes tamén así o cren. Se isto lles permite, no caso do capítulo 1, volver a negociar a RPT, eu tamén estou de acordo con vostedes en que agora, non só pola situación económica, senón por como está configurada, hai que reformala, pero reformar a RPT non significa propoñer despedir a alguén e logo reformala, é ao revés. Na RPT imos analizar cada posto de traballo, cada servizo, cada negociado, e ao final determinaremos unhas consecuencias, iso tamén forma parte dunha planificación, e se pode meter a reforma da RPT dentro da planificación ou realizala aparte. Non se pode empezar polo final, ao non ser que haxa outras razóns, eu son unha persoa moi ben pensada e quero pensar que non hai ningunha razón de persoal nin percepcións sobre os servizos, porque eu xa falei aquí nun pleno anterior sobre os servizos concretos que pretenden modificar, facer desaparecer. Volvo a repetir que se é unha planificación de toda a RPT, se é planificar en conxunto todos os servizos do concello, ver onde estamos e onde queremos chegar, iso non ten ningunha explicación. Aproveiten esta moción e rectifiquemos.

Referíndome ás modificacións propostas polo grupo socialista, se facendo eses apuntamentos queda mais clarexado, por suposto que as aceptamos.

Intervén a concelleira do grupo municipal socialista dona **Patricia Conde Lois**, que di: Eu tamén estou, como o BNG, un pouco desconcertada, porque realmente non sei cales son os motivos que levan ao goberno a rexeitar esta moción. Aquí se falou de dúas razóns ate o momento: en primeiro lugar que a RPT está desfasada, claro, evidentemente, o concello medra en persoal (ate agora), pero esa non é unha razón para impedir unha redución do capítulo de persoal. A RPT leva desfasada varios anos e o goberno anterior mantivo igual á xente nos seus postos, iso non é unha xustificación, sinceramente non entendo a explicación a isto, o lóxico é partir dunha idea clara que nós tiñamos e temos agora, que é despidos cero, e logo facer o plan económico e financeiro, partir de despidos cero e logo facer a modificación da RPT, pero non sei por que me da que o que se pretende é partir dunha redución de persoal e logo modificar a RPT. Esperemos que non, desexemos que non e estaremos aí para defender que non sexa así.

Cando falan de que non van incrementar a presión fiscal, xenial, a moción non lles obriga, o acabamos de explicar, falabamos de que de ser o caso se se produce un aumento da presión fiscal ou un aumento nas taxas e prezos públicos, se non se produce no plan de equilibrio, xenial, non é motivo para que rexeiten a moción. Eu creo ademais que teñen a oportunidade única, en canto ao tema de negociacións que están tendo co persoal, de paralizar esas negociacións e facer o plan de equilibrio económico partindo sempre da idea de non redución de persoal e despidos cero. Non vexo cales son as xustificacións polas que non se apoia a moción, porque entendo que estarán da acordo en que terán que ser aprobados ou antes dos orzamentos ou ao mesmo tempo, que tampouco sería o peor acudir ao crédito o menos posible, que xa é un dos obxectivos, buscar as aportacións doutras administracións, que eu entendo que xa o goberno o está a facer, que non se afecte aos servizos de benestar. Penso que isto debería ser a política do goberno actual: que non se reduza o persoal, porque sinceramente penso que é aí onde chocan as ideas. En canto a procurar manter o nivel actual de servizos, coas propostas que fixeron hai pouco se eliminan servizos, e aquí, xunto co persoal, é onde atopan as diferenzas, pero entendemos que están a tempo de rectificar, e como plantexa o BNG, suspender as negociacións co persoal e facer o plan de equilibrio económico que conteña, como defendemos, que non haxa redución de persoal.

O señor alcalde don **Santiago V. Amor Barreiro** pregunta á señora secretaria se as emendas feitas *in voce* polo grupo municipal socialista deberían ser definidas e pasadas a papel, e a señora **secretaria** pregunta á concelleira dona **Patricia Conde**

Lois se se trata de substituír os puntos tres, catro e sete para que queden como propuxo na súa intervención, ao que a concelleira responde que si.

Intervén o concelleiro delegado de Persoal, Reforma Administrativa, Servizos e Urbanismo don **Ramón García Argibay**, que di: Non entendín moi ben a afirmación do BNG respecto a rectificar, nós non tentamos rectificar nada neste sentido, o temos totalmente claro, non estamos rectificando absolutamente nada. O que levamos facendo durante estes meses e de forma urxente é tomar medidas, porque a situación deste concello, o que está mais que demostrado, é moi mala é precaria, a pesar do que di o BNG de que non é tan mala, ogallá non fora así pero é crítica, economicamente falando estamos na UVI, moitas veces tendemos a dicir que non é tan mala, pero cando vemos os datos, que son o importante, aínda que ás veces as cifras hai que explicalas ben, vemos que si.

Cando nós chegamos ao goberno vimos que por primeira vez na historia deste concello o resultado orzamentario era negativo, por tanto esa magnitude económica hai que tela moi en conta, porque ademais era considerablemente negativo, rondando os *menos* douscentos mil euros, por primeira vez na historia deste concello. Ademais o aforro neto, tamén negativo, é por nada menos que dun millón catrocentos mil euros, que non son un millón catrocentas mil pesetas, hai que facer o cálculo e multiplicar por 166,386. O que implican estas cuestións, por exemplo, é que teñamos problemas graves, se é que non nolo impiden, no acceso a crédito a longo prazo, e vostedes deberían sabelo e o deberían de recoñecer, por tanto afirmar que a situación do concello non é tan grave, se non podemos acudir ao crédito a longo prazo, que é imprescindible para facer inversións, a ver se a situación deste concello é crítica economicamente falando ou non. No 2011 e nesta situación bastaba con presentar un plan de saneamento para que o aprobase a Xunta de Galicia, e agora parece que nin así poderá ser, o prohibe a lei de presupostos para o 2011 cuxas previsións foron confirmadas polo consello de ministros para o 2012 o pasado 30 de decembro.

Ademais o remanente de tesouraría volve ser negativo en cerca dun millón de euros, váianse fixando nas cifras, negativo, negativo, falamos de millóns de euros. Por certo, probablemente en tesouraría é a cifra mais negativa na historia do concello de Ames, tamén estamos batendo récords negativos, para a nosa desgracia, economicamente falando neste concello, por tanto intentar defender que a situación económica deste concello non é tan mala... eu creo que as cifras falan por si solas. E aínda hai mais, é como o conto, *non se vaian todavía....* Primeiro que no 2011 todo indica que esta situación empeorou e pode ir a peor. Por exemplo, cando chegamos nós aquí atopamos facturas de caixón que superaban os dous millóns de euros, esa é unha magnitude que hai que ter en conta. Vostedes recoñecen que o 2012 vai ser duro, o recoñecen, pois nós temos que facer unha redución importante como consecuencia do reparto dos impostos do Estado.

Non só non estamos ingresando senón que temos que devolver o pouco que temos. Vostedes saben que a porcentaxe da débeda que se permite a un concello pasou do 110 % ao 75%, polo tanto se antes tiñamos unha capacidade de endebedamento mais ou menos alta xa se reduciu, tamén froito desa marabillosa xestión do PSOE en Madrid. Sempre hai que falar das magnitudes, e non hai que olvidar que temos unha operación de tesouraría a curto prazo en torno aos dous millóns oitocentos mil euros que devolvimos a final de ano, que tamén computa como débeda. E seguimos, porque ogallá puideramos quedarnos aí, pero vostedes dan un dato de débeda por habitante que está en torno aos douscentos e pico euros.

Datos que preparamos para este pleno precisamente: a data de hoxe, só para comparar un pouco, para que saiba a xente cal é a relación de débeda por habitante en Ames, agora mesmo é de 387,75 euros. Se a comparamos coa media de Galicia é de 229, e se a comparamos coa provincia da Coruña, 262,45 euros é a media de débeda por habitante ¿e non é tan grave a situación económica deste concello? E isto vai *in crescendo*.

Intervén o concelleiro do grupo municipal do BNG don **Xosé Anxo Doval Rey** para dicir: Iso é manipular, están comparando o 2010 co 2011.

Toma a palabra o señor alcalde don **Santiago V. Amor Barreiro** para dicir: Perdón, señor Doval, damos datos reais coa liquidación do ano 2010.

Continúa o señor **Doval**: Está aí o señor interventor para que diga cal é a débeda por habitante.

Pregunta o señor **alcalde** ao señor interventor: señor interventor ¿cal é a débeda por habitante?

Continúa o señor **Doval**: No 2010.

Intervén o señor interventor don **José Antonio Rueda de Valenzuela** para dicir: De memoria non o sei.

Continúa o señor **Doval**: Pero eu si, que está por escrito.

Continúa o señor **Rueda de Valenzuela**: Me temo que a controversia ven de considerar o que está reflectido no capítulo 9, que é a débeda subscrita e a débeda que está por subscribir, que é a débeda dos exercicios 2004, 2005, 2006 e 2007.

Continúa o señor **García Argibay** coa súa intervención: Se é que se pode disfrazar como queiran, e alporizar ás veces pode traer outras consecuencias, pero miren, a realidade é a que é, vostedes se poderán alporizar, poderán dicir o que queiran, pero que por primeira vez temos un resultado orzamentario negativo na historia deste concello é impepinable. E que temos por primeira vez nada menos que un aforro neto negativo nada menos que de *menos* un millón catrocentos mil euros é impepinable, póñanse vostedes a facer o pino se queren, pero lles vou seguir dando mais datos, por iso dicía que ogallá termináramos aquí. Agora mesmo operacións a longo prazo temos 5.854.000 €, operacións a curto prazo 2.845,000 €, en total 8.700.000 €. A débeda viva está agora mesmo no 47,02%. Fíxese vostede, señor Doval, os datos son os que son e nós non manipulamos. Vostedes no concello de Ames estiveron sempre enmascarando as cifras, sempre negando a realidade, e agora nós temos que tomar medidas. Para vostedes é moi fácil falar pero o problema é que xa non se lles da credibilidade. Señor Doval, non intente derivar o discurso por onde non é, falaban de anos de brotes verdes e resulta que estamos en recesión. A realidade é a que é.

Intervén a voceira do grupo municipal do BNG dona **Pilar Candocia Pita** para dicir: Mentira, cando teñamos os datos dos outros concellos e a media galega do 2011 a poderemos comparar co 2011; é como se eu comparo o que ti gañas no 2010 co que pagas no 2011.

Toma a palabra o señor alcalde don **Santiago V. Amor Barreiro** para dicir: Xa sei que a vostedes este tema lles está afectando moito, lles afecta agora, durante os anos que gobernaron este concello non lles afectou.

Continúa a señora **Candocia Pita**: Claro que nos afecta, e afecta aos veciños e aos traballadores, e cando gobernamos tamén nos afectou. Hai débedas e hai haberes, e ás veces para que haxa haberes ten que haber débeda, é así de simple e o sabemos todos nas nosas casas. É de manual.

Continúa o señor **García Argibay** coa súa intervención: Cando chegaron vostedes ao goberno no ano 2003 este concello tiña en torno a 76 traballadores, e cando chegamos nós ao goberno este concello tiña 278 traballadores.

Neste momento toma a palabra o señor alcalde don **Santiago V. Amor Barreiro** para dicir: Eu pediría aos grupos da oposición que por favor respecten a quen está no uso da palabra. Aquí estivemos escoitando o que quixeron dicir, e supoño que se hai unha persoa que está exercendo de portavoz polo grupo municipal socialista neste punto, que sexa ela a que teña que retiralo.

Continúa o señor **García Argibay** coa súa intervención: Coa venia da oposición, é moi fácil falar de planificación, de que primeiro planifiquen e logo actúen, é moi fácil, iso é unha demagogia perfecta. O que é de manual é non gastar mais do que se ingresa, e

son outras moitas cousas que vostedes se negaron a facer e así nos vai. O que é de manual son as medidas que se tomaron dende o goberno central e neste concello. É moi fácil agora, cos poucos meses que levamos gobernando, o co que leva o PP en Madrid, un mes escaso, poñer o grito no ceo, pero daqueles polvos veñen estes lodos e é moi fácil alporizarse, o digo con toda a claridade do mundo, os datos son os que son, e a frialdade dos datos é a que é, nin mais nin menos.

Me gustaría deixarlles claras unhas cuestións. Cando falan de que hai que planificar é certo, e nós cando estabamos na oposición analizabamos e planificabamos cos datos que tiñamos, pero cando chegamos ao goberno vemos que deses datos o parecido coa realidade é pura coincidencia, e vemos que hai que tomar medidas urxentes, porque se non hai determinadas cuestións que son insostenibles, por exemplo os servizos de comedor, de Bos días cole e de Tardes divertidas. E vostedes na súa moción falan de progresividade e non sei por que, porque o primeiro goberno neste concello, e penso que en moitos, que aplica a progresividade, somos nós, con vostedes apoiando, o primeiro, e a nosa intención é continuar por ese camiño. O noso deber cando asumimos o goberno é tomar medidas urxentes, *urxentes*, para salvagardar certos servizos básicos. Unha vez que temos conciencia de como evolucionou e de cal e a situación mais ou menos real do concello, porque cada vez aparecían cousas novas, como facturas gardadas por algún caixón, foi cando empezamos a estudar mais a fondo e a programar mais a longo prazo. Pero como vostedes saben, antes do 31 de decembro hai que tomar certas medidas, porque esas medidas, se non se toman a tempo e se quedan nun caixón, como fixeron durante oito anos, habería que esperar outro ano mais polo menos.

Este goberno non está aquí para perder tempo, xa estiveron outros perdendo tempo e tirando cartos a esgalla, como facturas que apareceron por mais de sesenta mil euros polo mantemento de piscinas, que aínda hoxe non sabemos de onde saíron. Hai que ser un pouquiño coherentes e non se pode facer demagogia fácil, porque a demagogia fácil foi a que nos levou a esta situación tanto a nivel nacional como a nivel local, e por suposto tamén autonómico. Insisto en que hai que ser coherentes e non facer demagogia porque son temas moi serios, extremadamente serios.

É de sentido común ¿a que goberno lle gusta tomar medidas impopulares? dende logo ao Partido Socialista e ao BNG non lles gusta, e de feito non as tomaron nunca e estiveron falando durante moitos anos de que todo vai ben ate que pasou o que pasou, ate que nos puxeron ao bordo da quebra técnica a nivel nacional e no concello de Ames, ao bordo da intervención. Este concello hoxe está intervido *de facto* grazas a esa fantástica xestión económica e esa planificación e ese análise que vostedes fixeron durante oito anos. Esa é a verdadeira realidade, que este concello está intervido *de facto* porque ten que pedir permisos para todo, e a nós non nos da igual, esa é a grande diferenza. Planificar si que hai que planificar, e niso estamos, estamos preparando o plan económico financeiro por primeira vez cando xa se tiña que ter feito no anterior exercicio e no anterior e no anterior. A ver quen planifica e a ver quen non. Nós planificamos pero antes temos que tomar medidas, porque senón isto se vai, simplemente se vai, pechamos a porta. Esa é a diferenza, e cando falamos de que o remanente de tesouraría é negativo en cerca dun millón de euros non é este o primeiro ano que o é, o anterior en quinientos mil, o anterior en douscentos mil, era unha gráfica que ía *in crescendo* e era moi fácil de previr, pero non se adoptou nin unha soa medida para evitalo. Eses son os datos reais, o resto é demagogia e brotes verdes que non se ven por ningún lado por desgracia para todos.

Nós sabemos que tanto os que estamos neste lado coma os que están nese teñen interese en que isto saia ben e o agradeceremos, e cando prestan colaboración como cando foi o tema da subida das taxas dos comedores, Bos días cole e Tardes divertidas, o agradecemos publicamente e o seguiremos agradecendo. Ese é o labor que temos todos, tentar sacar este concello adiante, pero para iso hai que tomar medidas aínda que sexan impopulares algunhas delas. E cando falamos da RPT, se

temos en conta que determinados servizos non están nin na RPT, como por exemplo a radio municipal e outros moitos postos de traballo, iso non é demagogia, son datos reais, ou que a radio municipal custe 175.000 € ao ano e que só se escoite en Bertamiráns núcleo, iso son datos reais, hai xente que nos para e nos di que non sabía que tiñamos radio municipal, iso non é demagogia, son datos reais. Por tanto, o que nós temos que facer e imos facer é garantir os servizos básicos, e o estamos conseguindo, ás veces coa axuda da oposición e ás veces non, tan fácil coma iso, pero dende logo este é un tema demasiado serio como para andar facendo incluso exclamacións e alporizarse. Entre todos temos un deber, tanto o goberno como a oposición, e de aí que unha das nosas iniciativas sexa seguir informando e convocando aos voceiros municipais, porque creo que entre todos isto pode saír adiante, con colaboración, non con atrancos, non con críticas dicindo que todo vai ben neste concello e que non está tan mal. Se non está tan mal e con estes datos explíquenlle vostedes á cidadanía amiense por que este goberno tivo que tomar medidas impopulares, que non se arrepiñe de tomalas, e se dentro de catro anos temos que pasar á oposición pasaremos, pero pasaremos coa conciencia tranquila de facer ou intentar facer as cousas ben, independentemente de que sexan impopulares ou non. Nós temos que gobernar, para iso estamos aquí e para iso nos elixiron.

Ante a demanda de varios concelleiros da oposición de intervir, o señor alcalde don **Santiago V. Amor Barreiro** toma a palabra para dicir: Vostedes esgotaron a súa segunda quenda de intervencións. Se queren facer unha aclaración se lles concede a palabra.

Intervén polo grupo municipal do BNG o concelleiro don **Xosé Anxo Doval Rey** para dicir: Nós presentamos unha moción que pretendía ser positiva, e dende logo que cando falamos e cando escribimos sempre procuramos dicir a orixe das cousas e comparar cousas iguais. Comparar os datos do ano 2010 de débeda de Galicia cos do ano 2011 de Ames, que por certo, a oposición non coñecía ate hoxe, é manipular, é mentir, porque están comparando parámetros distintos. A débeda de Galicia é imposible que a día de hoxe sexa de 229 euros por habitante. Imposible. O escrito do BNG di exactamente que é o que compara e con que parámetros, cos coñecidos, non nos inventamos nada. Son da conta xeral 2010 e dos datos do Ministerio de Economía, que di que son menos aínda, pero eu acepto a conta xeral, por favor non manipulemos. E cando falamos da situación económica do concello e mais da global, da crítica situación económica, nós no grupo municipal do BNG, tanto no escrito como cando facemos manifestacións públicas, falamos de se é crítica ou non comparando parámetros iguais.

Dende logo nunca se dixo pola nosa parte que o concello de Ames tivera unha situación boa, nunca, non é boa nin a do concello de Ames nin a de ningún concello de España nestes momentos, polo menos da inmensa maioría deles, e cando comparamos cuestións similares, se o concello está nunha situación crítica ou na UVI ou intervido, se esa é a situación do concello de Ames, a situación da maioría dos concellos galegos de mais de 25.000 habitantes está peor. Precisamente por iso, porque está en mala situación, sexa crítica ou non, imos recordar o cualificativo, se vostede quere que diga situación crítica dou fe das súas palabras porque non a coñezo, a do 2010 dende logo non o era, pero se di que é crítica é crítica, simplemente por iso temos que elaborar o plan de equilibrio económico financeiro, pero agora, non cando estaba o PSOE, porque antes deu a entender que era obrigatorio, posiblemente fóra bo facelo, pero non era obrigatorio. Este concelleiro ao longo destes meses xa ten manifestado que debería facerse ese plan de equilibrio, antes incluso do último pleno, en que vostede o manifestou.

Non cabe en ningunha cabeza que se planifique para restablecer unha situación de equilibrio e antes da planificación xa se tomen medidas. Nós na nosa proposta nin sequera estamos dicindo que non se deben de tomar medidas no capítulo 1. Pode ser que si. Dende logo eu, que vin os orzamentos, digo que hai moitos outros capítulos,

partidas de gastos correntes, ás que se lles pode botar man sen chegar a iso, non digo que non no capítulo 1, pero fagámolo ao final, que sexan as persoas as menos afectadas. E fagámolo como o están facendo noutros concellos. Por exemplo o concello de Vilagarcía, por falar de parámetros similares, no ano 2010 tiña unha débeda por habitante de mais de setecentos euros e fai un plan previo e di que vai afectar ao capítulo 1, pero en ningún caso vai botar xente á rúa, vai afectar a partidas de produtividade, a partidas de acción social, vai a non cubrir vacantes, a situación é moitísimo peor que aquí, e non manifestan a intención de botar a ninguén. Por iso volvo dicir con ánimo de ser positivos que teñen a nosa colaboración total no que nos pidan para elaborar ese plan, pero por favor non empecemos ao revés. Se ademais nos din que hai que reformar a RPT estamos de acordo, pero eu é a primeira vez que vexo reformar unha RPT e primeiro botar xente, reformar a RPT quere dicir outra cousa, se estuda a situación da plantilla, os servizos, como hai que prestalos, e ao final tomamos as decisións e pode ser que haxa que prescindir de prazas, non o sei, pero non empecemos ao revés. E xa postos, díganme un só precedente onde se manifeste a intención de reformar a RPT, e antes de empezar se bote á xente.

Intervén a concelleira dona **Patricia Conde Lois** para dicir: Xa me imaxinaba que a escusa ía ser a crítica situación económica deste concello que era a que levaba a tomar as medidas urxentes que teñen que facer. Sen embargo os resultados que amosan son os da conta do ano 2010, en que estabamos nós gobernando e non levamos a cabo esas medidas drásticas. Hai concellos gobernados dende hai anos polo PP, por non dicir nomes, que teñen un remanente de tesouraría negativo de dous millóns de euros, polo tanto non veña dicindo que é o goberno socialista, porque a crítica situación económica é en todos os concellos, gobernados polo PP, polo PSOE ou polo BNG. A situación é difícil, e estes concellos que teñen un remanente negativo nono utilizan como arma para despedir á xente, supoño que levaran a cabo outras medidas. Eu creo que aquí hai outras solucións, hai moitas partidas en materia de persoal que poden substituír ás decisións que pretenden tomar. Hai partidas de produtividade, de Fondo de Acción Social... ¿por que non prescindir temporalmente desas partidas e dar amparo aos postos actuais? porque no seu día para incrementar os soldos e as dedicacións si que había diñeiro, pero agora para o persoal din que non hai diñeiro. Xustificar as medidas que se están adoptando pola situación económica non o entendo. Eu sei que hai que tomar medidas, pero non estas. Falan de resultado presupostario negativo, aforro neto negativo dun millón seiscentos mil euros, remanente de tesouraría negativo... e falan como se fora novecentos por aquí, un millón seiscentos por alí... son cifras, son indicadores; se hai un déficit na tesouraría de case un millón de euros haberá que aceptalo, pero teñen préstamos pendentes de concertar, por exemplo. O que non poden pretender é aforrar, é dicir que se basean en indicadores para xustificar despedimento de xente e medidas drásticas. Miren, non, porque no 2010 estaba gobernando o Partido Socialista e tiña esa situación.

Din que chegaron ao goberno e encontraron facturas no caixón, e eu necesito que me explique exactamente a que se refire con iso ¿refírese a que non estaban na contabilidade esas facturas? ¿dous millóns de euros? Pois eu solicito por escrito esa información, e que conste en acta. Eu necesito que mo faciliten. Señor alcalde, non teño esa información, porque dicir que había dous millóns de euros de facturas no caixón... serían dous millóns de euros pendentes de pago, que é moi diferente, pero todas constan por rexistro de entrada. Solicito que se me fagan chegar, porque en todo caso me parece facer unha acusación infundada. É evidente e lóxico que como en calquera cambio de goberno haxa facturas pendentes ¿ou que pretendían, telas todas pagadas e cobradas? se teñen un cambio de goberno terán que herdar os ingresos e as débedas, iso é así, pero non é “choricear” nin nada diso.

Falan de que teñen que facer devolucións ao Estado, e nós tamén, dende o 2009 estamos facendo devolucións ao Estado ¿e? Falan do da débeda bancaria, que é xa

para desistir, porque durante anos mentindo sobre débeda bancaria, primeiro de quince millóns de euros e aos poucos meses xa rectificaron e eran catro millóns, pero tiveron que chegar ao goberno, mentres estiveron na oposición eran quince millóns de euros. Teño unha revista na que vostede sae dicíndoo. Eilla traer. En todo caso a débeda bancaria que nós deixamos concertada e formalizada foi de catro millóns cen mil euros, é dicir, do 30% cando o límite é do 75%, por tanto non me diga que vostede non ten marxe e capacidade de financiamento para endebedarse, o que pasa é que computan préstamos que non están formalizados, computan operacións de tesouraría, que si hai que computar, pero non é débeda a longo prazo, e por tanto pediríalles que utilicen datos reais e oficiais e non manipulados, e digan cal é a débeda bancaria real formalizada a día de hoxe, a non ser que formalizaran algún préstamo dende que están no goberno. Vale que a situación é moi crítica, que é o que vostede da a entender, pero tamén ten ingresos ¿ou non recibe ingresos pola contribución de mais de catro millóns e medio de euros? ten que facer unha devolución de tesouraría, pero os ingresos xa os tiña antes e xa os manexou. Ten ingresos de vehículos, ingresos procedentes do Estado e toda a serie de atributos que ten este concello, haberá que facer axustes, pero por favor, non indo ás medidas fáciles, porque ao final a medida fácil é a redución de persoal.

Eu creo que haberá que sentarse co persoal e acordar o mellor dentro das posibilidades, as que dixen antes, como as horas extras, que xa me consta que se está facendo así. Hai fórmulas, e basearse en que no 2003 había 76 traballadores e agora mais de 200, é evidente, non hai a mesma poboación, non había os mesmos servizos no 2003, case ningún, todos se crearon a partires do 2003, é lóxico, ten que haber xente detrás deses servizos que están funcionando. Non había servizos e non había tampouco ingresos, hoxe hai mais ingresos, polo tanto esa non é unha explicación a o que se está facendo. Miren, distribúan, en moitas áreas é necesario moito persoal, se necesita persoal, redistribúan ese persoal para outras áreas, busquen outra solución. Ampararse na situación económica é a saída fácil e un discurso moi bonito para a xente que está escoitando, pero realmente non é o verdadeiro motivo polo que están a tomar estas medidas. Eu creo que están no momento de polo menos ter en conta as aportacións que fai o BNG, deixar en *stand by* as negociacións e facer o plan de equilibrio económico.

Intervén o concelleiro delegado de Persoal, Reforma Administrativa, Servizos e Urbanismo don **Ramón García Argibay**, que di: Señor Doval, na conta 2009 xa figuraba que era obrigatorio ese plan, lle guste ou non, revise a documentación e o verán, hai informes de intervención onde se fai mención á obriga de facer o plan, por tanto se vostedes falan de manipulación eu non vou entrar. Cando se fala de datos, porque agora xa nos perdemos con tantas cifras, eu cando as din foron claras e concisas e agora xa non se entenden. En primeiro lugar eu non dixen que este concello estiver intervindo, dixen intervindo *de facto*, que é distinto, pero dun paso a outro pouco hai, e vostede o sabe. Mire, nós non manipulamos absolutamente ningún dato, e vou ser mais preciso: a 31 de decembro do exercicio liquidado 2010 a débeda eran 379,75 €. A data de hoxe mais ou menos, cos cálculos que fixemos nós, 387,75. Estes son os datos reais, o contrario, señor Doval, se pode interpretar como queira.

Cando se fala de magnitudes económicas tan grandes como estamos falando aquí e se di que o concello ten ingresos, o cal cando vostedes estaban gobernando dicían continuamente, estes ingresos os tiñan igual e este concello foi a onde foi. Mire cómo planificaban e analizaban vostedes a situación: nun orzamento de 33,5 millóns de euros onde saíron dicindo “o orzamento mais grande da historia de Ames” (aquel fóra un titular magnífico, como outros que saen por aí ás veces provocados por vostedes e ás veces non), tiñan vostedes planificado como ingresos, ojo al dato, 12,5 millóns de euros nin mais nin menos por venta de patrimonio, case a metade, iso está nos informes, non son datos do PP manipulados entre comillas como din vostedes ¿e

saben canto ingresaron vostedes por ese concepto?: cero. Así é como xestionaban vostedes. Se a un orzamento de 33, 5 millóns de euros lle quitamos 12,5 millóns a ver a onde vai. Despois cando se ve a execución orzamentaria o orzamento non chegaba ao 40%. Lles dou mais datos e moi completiños: cando vostedes fixeron aquel orzamento de 8 millóns de euros tiñan previsto recadar polo ICIO 2,5 millóns, e todo parecido coa realidade é pura coincidencia, volveron a equivocarse. Foron arrastrando durante moitos anos esa situación e así nos luce o pelo, polo tanto non son excusas, son ralidades, nin mais nin menos, e despois vostedes o que fan é dicir que falamos de datos sen concertar os préstamos e logo nos din que podemos concertar os préstamos ¿en que quedamos? Se temos planificación, se temos que prever, se temos que planificar e analizar, teremos que contar con todo, e aínda que contemos cos préstamos concertados ou non, as contas non saen nin de casualidade. Se computáramos os préstamos pendentes estaríamos no 73,85%, rozando o máximo legal, e ademais vostedes saben perfectamente que hoxe é moi difícil e moi complicado optar a un crédito a longo prazo, vostedes o sufriron porque quixeron pedir un crédito de 4,5 millóns de euros e lles deron 2,2, por tanto ¿que nos queren vender agora? Os datos son os que son e non hai mais onde ir. Poderán facer demagogia, poderán dicir o que sexa, e digo que estamos intervidos *de facto* porque polas regulacións novas que se fixeron aínda temos mais problemas para acudir a crédito, e ademais polos resultados negativos de aforro neto aínda temos mais dificultades, por tanto ¿de que estamos falando? ¿en que queren vostedes sentar cátedra?

Mais datos e mais concretos: crecemento de poboación en Ames no ano 2003: 19.000, e poboación cando chegamos nós 29.000, un incremento porcentual do 24%. Crecemento de persoal de 78 a 262 (porque hai eventuais), incremento porcentual do 244%. Por favor, señor Doval, eu escoiteino con todo o respecto do mundo e só pido o mesmo.

Toma a palabra o señor alcalde don **Santiago V. Amor Barreiro** para dicir: Señor Martínez Carballeira e señora Candocia, silencio por favor, imos tentar levar o pleno da mellor maneira posible. Continúe, señor García Argibay.

Continúa o señor **García Argibay** coa súa intervención: Os datos son os que son e o mais lamentable, por utilizar un termo, é que vostedes digan que no ano 2003 non había servizos, coma se isto fora unha tribu, porque me pregunto e me gustaría que me respostaran que novas dotacións se fixeron dende o ano 2003 ate que chegamos nós, porque gardería había exactamente as mesmas ¿vostedes cambiaron a xestión? perfecto, ate que chegou A galiña azul, tranquilidade, non pasa nada. Se repasamos as dotacións en oito anos son pobres, porque as casas de cultura son as mesmas, xa sei que fixeron esa ampliación que non vale absolutamente para nada, lles custou Dios e axuda, tiveron parada non sei canto tempo e non tiña nin calefacción. E me queren contar que no ano 2003 andabamos todos con taparrabos.

E no Milladoiro ¿que cambiou en oito anos? Absolutamente nada, todo o contrario, foi a peor, e menos mal que non se lle tocou moito, como esa Travesía do Porto que da pena e agora a imos arreglar, que da pena vela, ou como aquela planificación “da caixa de tabaco”, que era todo o magnífico urbanismo que se facía neste concello, que nunca se fixo nin unha soa modificación do plan xeral e nós imos facer en breve tres, ou ao mellor catro, non quería dicilo aínda porque a min me gusta xogar sobre seguro. Nin unha soa modificación puntual en oito anos, catro de bipartito e catro de minoría, por iso agora temos os problemas educativos que temos, aínda que teñamos que asumilo nós e o imos asumir e o imos solucionar, como o estamos solucionando co terreo da nova gardería que se vai facer aquí ao lado, ou escola infantil, dona Pilar, sabemos perfectamente do que estamos falando ¿de que presumen? gasto corrente por un tubo e os obxectivos fíxense vostedes nos últimos orzamentos, que por certo facían un ano si e outro non, que os prorrogaban e así están, miremos o resumo dos orzamentos e da execución orzamentaria e observamos que o capítulo 1 e o 2

estaban cerca da execución do cen por cen, todo gasto, e o capítulo de inversións un ano era do 18% e outro ano do 20% mais ou menos, e iso é como xestionaban vostedes, gasto máis gasto máis gasto. Din que o concello ten ingresos, pois menos mal que os ten, porque se non ao mellor había que pechar a porta.

Ás persoas ás veces hai que explicarlles as cousas cando hai tal cruce de datos. Cando vostede di que nós dixemos que tiñamos unha débeda estando nós na oposición de quince millóns, non recordo ben, pero non dixemos unha vez quince e outra vez doce ¿sabe de onde saíu ese dato? mostrámosllo aquí cando vostede estaba nesta mesa, e llo ensinei eu, e se o chego a saber traio o papel hoxe, con informe de intervención que non invento nada, quince millóns de euros, sacamos o dato do informe de intervención. Non inventamos absolutamente nada, non como outros. Sacamos os datos das fontes limpas, e as fontes limpas son os servizos técnicos, nin mais nin menos. Por tanto non están nas mellores condicións de momento e espero que dentro de pouco si teñan motivos sólidos, vostedes que están na oposición espero que estean para corrixir, que é unha das súas funcións, pero de momento non están nin na mais mínima condición para dicirnos o que están dicindo, nin o mais mínimo. E seguiremos tomando medidas de aforro, porque dicir que non aforremos, se esa é a súa política xa sabemos a onde nos leva o non aforrar.

Por non aforrar chegamos onde estamos, sempre e cando interpretemos o aforro, como un concello non ten ánimo de lucro é a dualidade ingreso e gasto e debe de estar equilibrada, iso é o que pretendemos nós, e para iso hai que tomar as medidas que estamos tomando e por iso hai que ser prudentes dende o goberno e dende a oposición. O que non van colar de momento, ao mellor mais adiante si porque falamos coa xente cando saímos á rúa e así contrastamos opinións, como cando estabamos na oposición. E a xente ten moi claro que hai que tomar medidas, voulle poñer un exemplo e remato: hoxe pola mañá viñeron ao concello a verme dúas persoas que viñan pola numeración de Ortoño e viñan indignadas porque dicían que levaban esperando pola numeración non sei canto tempo e que tampouco tiñan aínda as placas para poñer numeración nas casas. Dicían que fóran toda a vida de Ortoño e que non sabían o porque as cambiaran de lugar, que por favor o solucionaran. Ademais dicían que a numeración estaba con 14A,14B,14C... e que non tiñan placa, e nós buscamos e dixemos non se preocupen, pero o das placas de momento non podemos obtelas porque a empresa non nolas sirven ¿e saben por que? porque non se fixo nin un só pago. Esta anécdota que contamos que non é ningunha broma, porque ocorre practicamente en todos os departamentos onde os nosos compañeiros e nós estamos a traballar todos os días, é o café de cada día e a tónica xeral, e para iso só hai unha solución que é non gastar mais do que ingresamos, se o queren entender estupendo e se queren colaborar estupendo, pero este goberno vai seguir traballando e gobernando, e vai tomar as medidas necesarias aínda que sexan ou non impopulares. Iso é a realidade, o demais o deixo para vostedes.

Toma a palabra o señor alcalde don **Santiago V. Amor Barreiro** para dicir: Non sei cales son as fontes da información que plantexa o BNG, as fontes do grupo de goberno son a liquidación do orzamento, a xestión económica e as previsións, porque aquí non podemos estirar mais do que da a manta. Este goberno herdou unha situación, esa é a realidade mal que lles pese, herdou unha situación que vostedes deixaron. Unha situación moi complicada, porque os compañeiros e compañeiras deste goberno damos a cara diante dos provedores para poder polo menos calmalos, porque non lles podemos dicir que van cobrar en tal data ou tal outra ¿que mais nos gustaría a nós? Se lles dixéramos unha data os enganaríamos, antes se daban datas e nós non imos comprometer datas se antes non temos a información que nos pasan a diario os departamentos económicos. Este goberno tiña dúas opcións, seguir facendo o que fixeron vostedes: café para todos, ou tomar medidas, e por mais que nos pese non nos queda outra que tomalas. Nos gustaría seguir orzamentando 12

millóns de euros en venta de patrimonio, pero sabemos que non é posible vender patrimonio e xa o dixemos no ano 2008, ou poñer que imos ingresar 2,5 millóns de euros de imposto de construcións, pero ¿para que nos imos enganar? ¿non é mellor facer un orzamento real, co seu desfase pero real? ¿que fixeron vostedes? grandes titulares, é mais, cando o BNG apoiou o orzamento do ano 2010 eu sei que os compañeiros do BNG que estaban aquí creron no goberno socialista e fixeron un pacto para aprobar aquel orzamento, e había unha serie de inversións que figuraban para aprobar aquel pacto de orzamento que estaba supeditado a que nos dera o concello de Ames catro millóns de euros, e despois nos deron dous millóns douscentos, pero despois non foi preguntar o grupo socialista ao BNG que obras facían, que investimentos facemos. Eu lembro que o Centro sociocultural de Ortoño estaba nesa relación, pola cercanía do anterior voceiro do BNG, o lembro por ese motivo. Tampouco trouxeron a este pleno que había un acordo plenario de relación de obras e investimentos que se ían facer, e despois fixeron o que lles dou a gana, cando a súa obriga era traer ao pleno que nos deron 2.200.000 euros e estas son as obras que imos executar con cargo a eles, pero non o fixeron e tiraron para diante. Esa é a deslealtade que tiveron vostedes co BNG, esa é a realidade. Dígame onde está o acordo plenario, dona Patricia, onde di imos executar estas obras, dígame, non se poña nerviosa, que eu sei que vostede o pasou moi mal cando foi concelleira de Economía e Facenda, pero mire, se naquel momento se tivera plantado e lle fixera caso aos técnicos dos departamentos económicos outro galo nos houbera cantado, por avisos dos departamentos económicos non foi, pero non lle quixeron facer caso. O que quixeron foi criminalizar os servizos económicos deste concello.

Miren, a situación económica é a desesperación das empresas e dos provedores, que por froito da súa nefasta xestión agora mesmo está na situación na que está. A ferramenta dun plan económico financeiro está moi clara, non é unha ferramenta que sexa marchamo do BNG ou do PP, está aí, se no ano 2009 e no ano 2010, cando a intervención, non este interventor, a anterior interventora, lles dixo oiga hai que facer isto e non lle fixeron ningún caso, se llo fixeran ao mellor estaríamos nunha situación menos comprometida. O espírito da moción do BNG pode estar ben pero a motivación cae polo seu propio peso porque non viven na realidade, porque non coñecen os datos. Eu creo que durante estes meses falamos de datos que saen dos informes, e vostedes viven de espaldas á realidade, agora queren xustificarse, pero fagan con propostas serias e documentadas e que estean fundadas.

Sometidas a votación as emendas do grupo municipal socialista resultan rexeitadas cos votos a favor das mesmas dos representantes presentes dos grupos socialista e do BNG e o voto en contra dos representantes do grupo municipal popular.

Intervén a voceira do grupo municipal do BNG dona **Pilar Candocia Pita** para dicir: Unha pregunta sen ánimo de polemizar ¿ten sentido que se quen propón a moción quere modificala o goberno non lle deixe? porque outra cousa é que logo voten en contra da moción, que iso o comprendo. Se vostedes se absteñen nós podemos emendar a nosa moción ¿por que non podemos?

Toma a palabra o señor alcalde don **Santiago V. Amor Barreiro** para dicir: Vostedes voten o que consideren e déixennos a nós votar.

Continúa a señora **Candocia**: Retiramos a moción e presentamos outra, porque nós queremos cambiar iso ¿como non imos poder cambialo?

Intervén a señora secretaria dona **Rosa Ana Prada Queipo** para dicir: unha vez que un asunto chega a Pleno e chega ditaminado, calquera modificación sobre o que ven ditaminado tense que presentar como unha emenda e a emenda vótase, eu comprendo o que vostede di, pero se primeiro se votan as emendas e o voto maioritario as rexeita, aínda que vostede, dona Pilar, poida pensar que altera a súa moción orixinal, esa é a legalidade.

Continúa a señora **Candocia**: ¡É alucinante!

Continúa o señor **alcalde** : cada un vota o que quere.

Continúa a señora **Candocia**: o que estaba poñendo enriba da mesa non é un problema de legalidade, é dicir, si alguén ten unha moción e vostede ten unha proposta que quere modificar e eu estou en contra desa proposta qué mais me da a modificación, o que vou a votar é a proposta.

Sometida a votación a moción na súa redacción orixinaria resulta rexeitada cos votos a favor da mesma dos representantes presentes dos grupos municipais socialista e do BNG e o voto en contra dos representantes do grupo municipal popular.

A moción rexeitada é do teor literal seguinte:

Proposta do grupo municipal do BNG sobre a elaboración dun plan de equilibrio económico financeiro

Desde a súa toma de posesión, o actual equipo de goberno do Concello de Ames ven propoñendo nos Plenos unha serie de medidas orientadas a aumentar os ingresos, fundamentalmente a través do incremento das taxas e prezos públicos, e a baixar os gastos, coma a eliminación de servizos e redución de prazas da RPT, finalmente retirada do pleno do mes de novembro. E todo iso en razón da “crítica” situación económica.

Cos datos de decembro de 2010, ao noso ver a situación económica do Concello, non sendo boa, non xustifica moitas das decisións e, sobre todo que se fagan, con ningunha planificación a medio-longo prazo. As ratios de débeda por habitante están entre as máis baixas dos concellos galegos de máis de 25.000 habitantes e moi lonxe do máximo autorizado pola Lei de orzamentos para 2011, o remanente de tesorería negativo obriga a adoptar medidas para reduci-lo, pero con moito marxen para seguir calquera das tres vías recollidas na Lei : 1) redución de gastos no novo orzamento por una cuantía igual ao déficit producido, 2) concerto dunha operación de crédito polo importe do remanente, 3)no vindeiro orzamento aprobarse un superávit inicial de cuantía igual ou superior a esa cantidade.

A pesar de coñecer eses datos económicos o goberno municipal sigue amparándose na “mala situación económica” para seguir ca proposta de peche de servizos e minoración de prazas da RPT que está a negociar cos representantes dos traballadores esas medidas, sen terse presentado a aprobación do pleno un Plan de Emprego, nin ter xustificado as razóns desa minoración nin porqué eses servizos ou esas prazas.

Ben é certo que a situación económica para os concellos vaise ver empeorada para 2012, pola inexistencia de achegas extraordinarias ,como as que supuxeron as do chamado Plan E, e a obriga de devolucións á administración central polos maiores ingresos recibidos nos anos 2008 e 2009. Algúns deles xa teñen iniciado procesos de redución de gastos que afectan tamén a capítulo 1, pero en ningún caso a prazas ocupadas, ou de peche de servizos propostos en Ames, pero en ningún caso nos concellos de similar nivel de poboación.

No último Pleno extraordinario do mes de decembro o goberno local anunciou a elaboración dun Plan de Equilibrio Económico Financeiro que debe pretender dar unha coherencia a esas medidas que se están adoptando sen unha visión de conxunto e que pola súa transcendencia debe seguir unhas pautas adoptadas polo Pleno da Corporación.

Por estas razóns o Grupo Municipal do BNG de Ames solicita que o Pleno da Corporación municipal adopte o seguinte

ACORDO

1.- O Plan presentarase para a súa aprobación ao Pleno do Concello, despois de ser debatidos ca representación social, antes dos orzamentos de 2012 e buscará o equilibrio ao final do periodo 2012-2014.

2.- O recurso ao crédito, dentro dos límites establecidos pola lexislación, debe servir para cumprir os obxectivos do Plan sen condicionar a capacidade inversora de futuros gobernos.

3.- Un aumento da presión fiscal debe ir acompañada de medidas de progresividade e fraccionamento dos pagos.

4.- O aumento de taxas e prezos públicos debe graduarse para que non sexa disuasorio para os usuarios prioritarios de cada servizo.

5.- Buscarase un aumento das aportacións tanto de outras administracións como de entes privados que axuden ao financiamento de servizos.

6.- A redución do capítulo de gastos correntes non pode afectar aos servizos de benestar implantados en Ames nos últimos anos .

7.- De ser necesario acometer reducións no capítulo 1 non se fará con cargo a prazas da RPT ocupadas.

8.- En todo caso, o concello procurará manter o actual nivel de servizos, polo que non se abordará a supresión de servizos ou departamentos actuais.

9.- Así mesmo, o Plan analizará as posibilidades de implantación de novos servizos ou prestacións de carácter social por parte do concello, por si só ou en colaboración con outras administracións públicas, en atención ás novas demandas ou necesidades da maioría da poboación, que contribúan a incrementar o benestar e a calidade de vida en Ames.

O goberno municipal levará adiante os procesos de redución de gasto que se deriven do Plan, polo que suspenderá as negociacións de redución de persoal que agora está a levar a cabo.

Moción presentada pola vía de urxencia

O señor alcalde don **Santiago V. Amor Barreiro** da constancia de que hai unha moción presentada pola vía de urxencia e outórgalle a palabra ao grupo municipal propoñente, o BNG.

Intervén a voceira do grupo municipal do BNG dona **Pilar Candocia Pita** para dicir: En primeiro lugar aclarar que esta moción a asume o BNG.

Neste momento toma a palabra o señor **alcalde** para dicir: Tal é como reflicte a señora secretaria, antes de nada ten vostede que explicar a razón da urxencia.

Continúa a señora **Candocia**: Como non existe un regulamento de participación local non hai posibilidade de que os veciños e veciñas e outros grupos poidan presentar mocións se non as presenta un grupo, nós esperamos a que a Xunta de Goberno, á que tamén lle presentaron esta moción, a metera na orde do día, e como non a meteu traémola nos. Sempre dixemos, desde o inicio desta lexislatura, que aquelas cuestións que os veciños quixeran tratar tiñan que poder vir a Pleno, evidentemente gardando as formas, respecto e decoro, como é normal tamén entre os que estamos aquí. O BNG presentará como súas todas aquelas mocións de grupos veciñais e grupos que habéndose presentado, como Ames na esquerda ou Esquerda Unida, non obtiveron representación, porque eles entenden que é preciso falalo todo, outra cousa será o posicionamento de voto, que pode haber veces nas que non esteamos a favor de que se presente, pero de que se fale sempre estaremos a favor, e por iso aproveitamos esta ocasión para recordar que se faga ese regulamento de participación veciñal.

A moción que presenta Ames na esquerda é unha moción sobre as hipotecas, é unha cuestión que vai por riba dos grupos políticos, é unha cuestión que está na rúa e hai moitas asociacións a nivel de estado e galego que están traballando nese sentido, e

é unha cuestión de xustiza. Todos sabemos cal é a situación na que se encontran veciños e veciñas, aos que ás veces lles poñemos cara e ás veces non. Desgraciadamente cos tempos que estamos vivindo lle poñemos mais caras, e claro, parece que nos abre mais a sensibilidade cando ao veciño que está desahuciado lle poñemos cara, pero calquera veciño que está nesa situación de Ames ou doutro sitio, pero si é de Ames entendemos que é unha cousa que ten que ver co concello, pois o que ten que ver cos nosos veciños tenlle que interesar á Corporación municipal en primeira instancia. O que piden coa dación de pago é que aqueles veciños que teñan a casa como primeira vivenda e a perden, dando esa casa estean as cousas resoltas e non segan pendentes da hipoteca como acontece neste momento. Creo que é tan claro que non necesita mais explicación e por iso tamén o BNG non só a fai súa senón que tamén está a favor dela. Como é unha moción que entra por urxencia e non a tiñamos prevista previamente vou ler os acordos.

Rematadas as intervencións e realizada a votación da urxencia da moción presentada, esta resulta rexeitada cos votos favorables dos membros presentes do grupo municipal do BNG e do grupo municipal socialista e os votos en contra dos membros do grupo municipal popular.

Punto sétimo.- Rogos e Preguntas.-

Rogos.

Toma a palabra o concelleiro do grupo municipal do BNG don **Xosé Anxo Doval Rey** para formular o seguinte rogo:

Primeiro rogo: Respecto dos temas de subvencións a asociacións deportivas e culturais concedidas neste ano referidas ao ano pasado, a verdade é que eu estiven nunhas cantas e xustificar a ano pasado unha subvención é complicado, porque desde logo os cartos día a día nunca sobran, e mentres non cheguen eses cartos dificilmente se asume boa parte da actividade para a que se solicitou esa axuda. Quero dicir con isto que as asociacións teñen que xustificar de aquí ao 29 de febreiro unha serie de facturas para poder cobrar esa subvención e nalgúns casos si é posible que se realizará a actividade para a que se solicitou a subvención, pero noutros, e a miña experiencia así o corrobora, seguramente estiveron pendente de ter esa subvención para poder efectuar a actividade ou unha parte desa actividade, e así ter unha factura. Eu creo que resolvendo a ano pasado polo menos vai haber moitas que teñan dificultades para xuntar todas elas. O rogo é que por favor, para anos sucesivos se resolvan con tempo, para que as asociacións non teñan este problema.

Toma a palabra a concelleira do grupo municipal BNG dona **Susana Mallo Redondo** para formular os seguintes rogos:

Segundo rogo: Este rogo vai para o concelleiro de deportes. Nin a min nin a ninguén se lles escapa, co pouquiño tempo que levan vóstedes no goberno, a excusa dos cartos, porque está tan ben argumentado, primeiro poñen ao señor Argibay a preparar datos, son as súas palabras non son as miñas, e así que o señor Argibay os ten preparados xa os demais concelleiros poden dicir “como non hai cartos aquí non se fai nada”, non se fai e mais ben se desfai, niso si que teñen bastante práctica. Nalgunhas cousiñas, quizais por responsabilidades menores que pensaban que podían con elas, escaparon ao “non hai” e comprometéronse a facelas, pero eses compromisos valen, como di meu pai “como unha corda podre” porque agora xa non é un mes, xa non son dez días, agora hai que gobernar e as cousas que se din que se van facer hai que facelas, e non crean que falo de millóns de euros, iso non me toca, é algo tan básico como limpar o local social de Biduído, ese o meu primeiro rogo para o concelleiro de Deportes. Coñezo unha situación lamentable polas persoas que usan este local para facer ximnasia, unha situación que ten que ver con hixiene e tamén con seguridade sanitaria, porque estou falando de roedores, estou falando de ouriños

e estou falando de defecacións, non se limpa este local e vostede comprometeuse con estas persoas en que se ía facer, que hoxe mesmo estaría feito, e queden aquí as fotografías desta tarde do local nas mesmas condicións lamentables, incluídos os baños nestes tres meses. Son pequenos compromisos que non creo que non lles proceda cumprilos.

Tercerío rogo: Outro tipo de cuestións teñen que ver coa Concellería de Cultura, que xa dixeran antes de comezar esta sesión, que xa non sei como dicila, que é a quinta, sexta, sétima vez e non sei cantas veces hei de dicilo porque sempre temos un si, sexa do concelleiro ou sexa do propio alcalde. Paguen xa o que lle deben ás asociacións de pais, págueno xa e aproveito para ter un xesto de dignidade co BNG nas axudas deste ano. Non son as prioridades do Concello, está clarísimo, pero vostedes comprometéronse a facelo, comprometeronse xa a facelo en maio e estamos a estas alturas igual. Ademais de outras axudas, que ben é certo non se comprometeron con elas, pero apelando á sensibilidade que teñen vostedes cara aos empresarios que non cobran e que eu comparto, esa sensibilidade pola que falaban de desesperación, teñan a mesma. Por iso o pido unha vez mais, e creo que a quinta: teñan a mesma consideración cara as familias mais necesitadas que están agardando aínda das axudas para material escolar, vostedes tiveron a ousadía no mes de setembro, que é o mes mais crítico para as familias con fillos, por certo o perfil do que se gaba este Concello, de subirlle o 50% todo tipo de servizos deportivos e culturais, pedímoslles que nese mesmo momento convocaran as axudas para material escolar e para libros e non obtivemos resposta, estamos en xaneiro e seguimos igual, aí si que non hai excusas e os gastos escolares non son un luxo.

Cuarto rogo: Hai case un mes tivemos e tiveron algunhas persoas a oportunidade de asistir a unha representación teatral no Milladoiro “O florido pensil” era unha obra que viña precedida por moita repercusión e por moito éxito, como ben coñece o concelleiro e eu mesma que tentei asistir, e houbo conflitos mais que lamentables. Houbo colas desde as seis e media da tarde para conseguir unha entrada, houbo persoas que retiraron mais de vinte entradas dunha soa vez e houbo moitos veciños de Ames que, alí mesmo llo manifestaron ao concelleiro, quedaron indignados por non poder asistir a esta representación. Era previsible que pasase algo disto porque sabíamos que era unha obra moi demandada e tiña moito éxito. Para vindeiras ocasións solicitamos previsións nos actos e como dúas medidas puntuais concretas pedimos: primeiro que a venda de entrada anticipada sexa para os veciños empadroados, de maneira que aqueles que vivimos en Ames poidamos asistir por riba de todas as persoas, que nós encantados de recibilos, pero que colapsan en unha ocasión así a casa da cultura. A outra proposta que lle facemos, dentro deste rogo, é que limite o número de entradas que se poden recoller, ao menos en eventos de esta índole.

Pregunta o señor alcalde don **Santiago Vicente Amor** se algún concelleiro, por alusión, quere intervir, e cédelle a palabra ao señor García Argibay.

Intervén o concelleiro delegado de Persoal, Reforma Administrativa, Servizos e Urbanismo don **Ramón García Argibay**, que di: Simplemente matizar que me aleda moito que se me critique por traballar na recopilación de datos, pero é a misión deste concelleiro como portavoz do grupo municipal, expoñer eses datos, e me aleda moito de que me critique por iso, nada mais, moitas grazas.

Toma a palabra o concelleiro delegado de Cultura, Educación e Patrimonio don **Alfonso Rey López** que dicir: Os rogos entendo que non teñen resposta, o único que me gustaría dicir é que apunto os rogos que a min me afectan e non deixa de resultarme simpático o rogo, porque eu falei contigo aquel mesmo día, e o que non entendo moi ben é por que mo volves dicir aquí hoxe.

Contesta a señora **Mallo**: Para que quede recollido.

Continúa o señor **Rey**: Eu mesmo falei cos veciños e comentamos todo o que había que comentar ao respecto, cos veciños e contigo, ou sexa que xa estamos ao corrente de toda a situación

Intervén a concelleira do grupo municipal socialista dona **Patricia Conde Lois** para formular o seguinte rogo:

Quinto rogo: O meu rogo ten relación co punto primeiro do orde do día. Observamos que faltan unha serie de decretos, non constan na documentación do pleno e non puidemos ver a nota interna da que falou o señor alcalde explicando. Aínda así, entendo que se xustificarán os motivos polo que non están e quería para facer o meu rogo preguntar se sendo a convocatoria do Pleno o nove de xaneiro os decretos non deberían de estar ate o nove de xaneiro, porque os decretos teñen que estar a disposición dos concelleiros ata o día da convocatoria, e claro, nese sentido vai contra un dereito dos concelleiros.

Toma a palabra o señor alcalde don **Santiago Vicente Amor Barreiro** para matizar que esa nota interna figura no expediente.

Continúa dicindo dona **Patricia Conde Lois**: Nós o que dicimos é que non tivemos coñecemento desa nota interna.

O señor alcalde don **Santiago Vicente Amor** reitera: Estaba no expediente.

Pregunta dona **Patricia Conde Lois**: ¿No expediente do pleno?, o día da convocatoria ¿estaba esta nota interna?

Resposta o señor **alcalde**: ¿vostede veu o expediente o día da convocatoria? O veu, e logo ¿non veu esa nota?

Continúa dicindo dona **Patricia Conde Lois**: Non, pero en todo caso entendo que estará xustificado o retraso neses decretos. De todas formas isto implica que os concelleiros da oposición principalmente temos limitado o dereito de acceso aos decretos cando a lei di que temos que ter a disposición todos os decretos para poder observalos, nese sentido me parece denunciábel o que se está a producir porque non temos a disposición os decretos que deberíamos de ter, paréceme que non é a maneira de actuar, nunca se produciu así, en anteriores ocasións se produciron retrasos nos decretos, pero sempre estaban.

Toma a palabra o señor alcalde don **Santiago Vicente Amor Barreiro** para dicir. O ano pasado, e se quere pode falar o señor interventor, pasou exactamente o mesmo, e vostede está lanzando aquí insinuacións de que aquí está pasando algo raro e non está pasando nada raro, o problema é que o día que convocamos o pleno hai que sacar cousas, igual que lles pasaba a vostedes.

Continúa dicindo dona **Patricia Conde Lois**: Pero nós en todo caso sempre viñemos ao pleno con todos os decretos, con retraso pero con todos os decretos.

Resposta o señor **alcalde**: Pero nós dimos unha xustificación e vostedes non.

Continúa dicindo dona **Patricia Conde Lois**: É que non temos que xustificar nada

Resposta o señor **alcalde**: Se non están os decretos como pasou o ano pasado ¿non teñen que xustificalo? Usen a mesma vara de medir.

Continúa dicindo dona **Patricia Conde Lois**: Para o pleno estaban todos, non despois da convocatoria do pleno, pero ao pleno viñeron todos. O meu rogo é que como me limitou a posibilidade de intervir no primeiro punto, dar conta dos decretos, por favor, que non se produza mais esta situación. Entendo os problemas que poidan ter, a proposta que plantexaran e xa rectificaron de pospoñer os plenos de nadal e agosto, o que queremos é que non se volva producir, porque limita os dereitos dos concelleiros da oposición ao acceso a eses decretos, me parece moi forte e non

queremos que se repita, igual que ocorreu con outras convocatorias que se fixeron de xeito urxente. Polo tanto queremos facer este rogo e que conste en acta.

Intervén a concelleira do grupo municipal socialista dona **Carmen Fraga Crespo** para formular o seguinte rogo:

Sexto rogo.- Rogo ao concelleiro de Vías, Obras, Parques e Xardíns que por favor pase a revisar a carretera de Augapesada a Pontemaceira, porque no mes de novembro rogueille que esixira á empresa que fixo a canalización da traída de augas que deixara a carretera como estaba, e hai mais ou menos un mes que foron facer ese arranxo e aquilo está feito un verdadeiro desastre, botaron area e grava e por sorte aínda non tivemos choivas, pero continúan alí de mala maneira, no momento que veña a choiva marchará a area polas cunetas e remataremos por ter as cunetas tapadas e a carretera chea de socavóns. A carretera non estaba nun estado marabilloso pero era unha carretera asfaltada e agora non está asfaltada, está feita un desastre e penso que teñen a obriga de esixir á empresa que a deixe polo menos como estaba, tendo en conta ademais que por alí pasan cantidade de peregrinos ao día. Os coches pasan polo medio porque é imposible circular pola beira e vostedes ateráanse ás consecuencias se pasa algo alí, é a segunda vez que llo estou pedindo e non sei se van tomar medidas.

Intervén o concelleiro do grupo municipal socialista don **José Manuel Miñones Conde** para formular os seguintes rogos:

Sétimo rogo.- O primeiro rogo é xa un clásico referido a Aldea Nova dirixido ao concelleiro de obras, é, xa non pedirlle que limpen as papeleiras, que xa sei que a próxima semana irán e as limparán, é a ver se é posible que a brigada de mantemento pase unha vez ao mes, e así evito rogar no pleno outra vez o mesmo.

Oitavo rogo.- O segundo rogo é en relación ás grabacións dos plenos. Tiven por primeira vez a ocasión de escoitar un deles, paréceme unha boa idea pero dende logo creo que a calidade é bastante mala. En parte penso que é polo uso dos móbiles, que fan interferencias e non se escoita, entón ou non se usan os móbiles ou melloran o sistema de grabación, que supoño que xa están nelo.

Noveno rogo.- O terceiro rogo fai referencia ao mesmo, é pedirlle ao señor alcalde que teña a ben anunciar o resultado das votacións, porque moitas veces non se anuncia, e escoitando a grabación non se pode saber, nas actas aparece, pero cando un só escoita a grabación nono pode apreciar e ten quen acudir á acta.

Intervén o concelleiro delegado de Persoal, Reforma administrativa, Servizos e Urbanismo don **Ramón García Argibay** para dicir: En canto á grabación ten razón e en canto ao uso dos móbiles tereino en conta.

Preguntas.

Intervén o concelleiro do grupo municipal do BNG don **Xosé Anxo Doval Rey** para formular as seguintes preguntas:

Primeira pregunta.- Con referencia ao que antes comentaba sobre subvencións ás asociacións, na medida de cumprir coa necesidade de xustificar as facturas ¿teñen pensada algunha medida para solventar este problema?

Segunda pregunta.- Con referencia a un acordo do Goberno Central sobre a subida do IBI, como antes anunciaron que xa teñen pensado adoptar certas medidas dentro da planificación ¿teñen contabilizado xa canto suporá para o concello de Ames esa medida adoptada polo Goberno Central?

Toma a palabra o señor alcalde don **Santiago V. Amor Barreiro** para dicir: No tema referido ás subvencións se estudiará, pero hai que cumprir a legalidade. En canto ás previsións se está estudando cal pode ser o impacto que se pode xerar a maiores.

Intervén o concelleiro do grupo municipal socialista don **Francisco Doval Galán** para formular as seguintes preguntas:

Terceira pregunta.- Trátase dunha pregunta que xa fixen outra vez e me dixeron que me ían dar resposta ¿en que consiste ese apartado amarelo que hai na Praza da Maía diante de Correos ao lado dun sinal que di prohibido circular vehículos? é algo que xerou grande descontento por parte dos veciños xa que non se sabe quen o pode usar nin por que. Reitero esta pregunta porque os veciños precisan unha resposta ¿que é ese sinal amarelo e para quen é? E tendo en conta, ademais, que se contradí coa sinalización e non se corresponde co uso que se está a dar.

Cuarta pregunta.- En relación á Escola de Música ¿ten director? hai unha persoa que fai as funcións de dirección ¿é a directora oficial esa persoa? porque o nomeamento aínda nono vin.

Toma a palabra o señor alcalde don **Santiago V. Amor Barreiro** para dicir: En canto á pregunta sobre o sinal, se falou cos veciños e cos administradores da comunidade, que estaban, como dicía vostede, preocupados por este tema, e contestarémolle por escrito.

Intervén o concelleiro delegado de Cultura, Educación e Patrimonio don **Alfonso Rey López** para dicir: A Escola Municipal de Música está en proceso de rexistro, estamos esperando a contestación, e despois corresponde facer o regulamento de réxime interno, que está en elaboración. A posibilidade de nomeamento da directora pode seguir distintos camiños: pode ser por oposición, concurso, nomeamento de Alcaldía, acordo de pleno... nestes momentos estamos pensando en nomeamento de Alcaldía. En cando teñamos o rexistro aparecerán os regulamentos de réxime interno.

Intervén o concelleiro do grupo municipal socialista don **José Manuel Miñones Conde** para formular a seguinte pregunta:

Quinta pregunta.- Saíu na prensa o cambio da telefonía para Vodafone e agora se está a facer o cambio da mesma. Como non temos información dos beneficios que tivo gustárame facer unha serie de preguntas: ¿afecta tamén á telefonía móbil o cambio ou só é para a telefonía fixa? ¿Cánto supón o aforro respecto do que se estaba pagando a Telefónica? ¿ten algún custo? ¿xa se asinou o contrato coa compañía? ¿Telefónica se puxo en contacto con vostedes de cara a pedir algún tipo de sanción no referente aos puntos, porque creo que había bastantes puntos que estaban utilizados nos terminais? ¿eses terminais foron devoltos ou quedan en propiedade do concello? ¿se fixo un estudo previo por parte da compañía Vodafone? Se existe nos gustaría ter unha copia.

Intervén o concelleiro delegado de Persoal, Reforma administrativa, Servizos e Urbanismo don **Ramón García Argibay** para dicir: Efectivamente se procedeu a un cambio de compañía como anunciamos no seu día, e afecta tanto á telefonía mobil como á fixa e a datos. A idea é unificar todo o sistema que temos de cada sede do concello. En canto aos procedementos de implantación agora mesmo a telefonía móbil está implantada. Existen grandes beneficios porque pasamos a ser todas as persoas que utilicen móbil, voz e datos, o que é un beneficio a maiores. Vai supoñer un aforro estimado en torno aos 5.000 € ao mes, ese desglose de aforro está considerado primeiramente na rebaixa das tarifas, que é moi considerable, falo de memoria pero creo que está en torno a un 40%. Tamén se aforrará coa supresión da centralita, que tiña un custe de 1.500 € mensuais, custe fixo, e polo tanto, sumado á rebaixa das tarifas suporá sobre 5.000 € mensuais. O primeiro mes probablemente haxa un incremento motivado polo cambio, porque agora mesmo estamos compatibilizando a fixa, que xa está implantándose tamén, o que sucede é que os prazos de implantación son distintos, a móbil foi rápida e na fixa xa están repartidos os terminais polos departamentos e xa se poden realizar chamadas dende eles, pero hai un pequeno problema ate que se porten tamén os datos, para o que hai un prazo.

Xa están asinados os contratos e hai un prazo de seis meses para facelo polas numerosas características de cada liña, vostede sabe perfectamente que cambiar os datos é moito mais complicado que cambiar a voz, e o compromiso de Vodafone non escrito -o escrito son tres meses- é de oito semanas. Xogaremos un pouco con eses prazos.

Tamén suporá un avance importante porque o sistema de datos que agora tiñamos era asimétrico, para que nos entendamos -porque vostede xa sei que o sabe perfectamente- a recepción de datos tiña unha velocidade alta pero o envío tiña unha velocidade baixa, en torno aos 6 Mb, e agora o que imos conseguir é que as liñas sexan simétricas, é dicir, que os datos que entran será en torno aos 12 Mb e os que saen de 4 Mb. Por tanto son liñas simétricas que van manter sempre unha mesma proporcionalidade e a ventaxa é moi grande. En canto a se temos a opción dos terminais, hai unha cantidade importante de terminais que xa son do concello porque xa pasou tempo de sobra, e ademais cando se fixo o cambio tamén se lle pediu a Movistar que rebaixara os prezos e integrara no mesmo paquete a unión de datos e voz, e presentou unha rebaixa considerable que creo lembrar rondaba os oito mil e pico euros anuais, pero non chegou ao nivel que presentou Vodafone. Falo de memoria pero despois se quere llo mostro.

En canto a sancións por escrito non temos nada pero temos o compromiso de que non, porque ademais hai unha cuestión que é que con este contrato matamos varios paxaros dun tiro, un deles é que a partires de agora non se vai cargar na conta do concello o importe, é dicir, antes Movistar tiña domiciliado ese importe na conta, o cal era unha irregularidade porque non está permitido pola normativa, e agora nós lles imos pagar, xa non nolo van cargar en conta. O control de gasto vai estar mais acotado.

O que provoca este sistema de telefonía móbil é que imos migrar a un sistema consistente en que os servizos que antes se prestaban directamente no concello, como centralita, xestión e configuración, dependían dunha empresa e cada vez que facían unha actuación cobraban, e agora se traslada a un centro que ten Vodafone que cumpre con toda a normativa europea de datos, e está firmado tamén, que o que vai provocar é que nós imos ter o control tanto de desvío de chamadas como de xestións determinadas, é dicir que se poden pasar chamadas de teléfonos móbiles a fixos e viceversa sen coste ningún. Toda esa xestión vai estar en mans do concello pero vai estar virtualizado, o que supón para o concello non ter que estar pendentes das actualizacións porque as fará Vodafone, e nos aforramos os costes de averías no material, a configuración de centralitas, etc.,

No que se refire ao estudo previo, si se fixo, e hai unha comparativa de prezos, feita tamén por Vodafone, onde se pode ver cal é o compromiso de rebaixa nas tarifas.

Na reunión que tivemos se acordou que nos ían atender como o bo cliente que somos. Como vostedes sabían, a contratación de Movistar era irregular porque no seu momento non se licitou e hai obriga de licitala polos importes, e o mesmo ocorre coa de Vodafone, segue sendo irregular, o que pasa é que está motivada polo aforro que supón. Un dos compromisos que se adquire é que nós só temos que estar un ano con Vodafone en voz, e pasado o ano intentaremos poñer os medios para que se licite o servizo como contempla a lei. Insisto en que ate o de agora estaba irregular e segue a estalo, quizais un pouco menos porque supón rebaixa das tarifas, pero irregular ao fin e ao cabo. Coa licitación faremos xa legal a situación en voz un ano, porque o gasto en infraestrutura de feito son terminais, e en datos tres anos ¿por que tres en datos? porque teñen que facer un gasto en maquinaria de router, en infraestrutura e arquitectura de rede, ese é o motivo. Penso que é un cambio interesante tanto dende o punto de vista económico como tecnolóxico. Cando venza o contrato e saquemos a licitación Movistar xa nos mostrou a súa intención de

presentarse e competir, polo tanto esa competencia xa redundou en beneficio do concello e esperamos que dentro dun ano volva repetirse.

Intervén a concelleira do grupo municipal socialista dona **Carmen Fraga Crespo** pra formular as seguintes preguntas:

Sexta pregunta.- ¿Existe un plantexamento para a limpeza dos parques infantís? Fago esta pregunta porque os parques están cheos de follaxe, silvas arredor e terróns, en mal estado, e cando empece o tempo bo penso que deberían estar en bo estado para xogar.

Intervén o concelleiro delegado de Vías, Obras, Parques e Xardíns don **Alfredo Taboada Alvelo** para dicir: Xa cho contestarei por escrito porque agora mesmo non teño coñecemento diso.

Sétima pregunta.- ¿Se está facendo unha revisión do alumeadado público? porque hai farolas que levan un mes parpadeando e outras apagadas por diversas partes do concello, e non sei se se fai revisión de vez en cando para ver como funciona.

Intervén o concelleiro delegado de Vías, Obras, Parques e Xardíns don **Alfredo Taboada Alvelo** para dicir: Si se fai revisión, o que non se pode prever é que hoxe funciona unha bombilla e mañá non.

Continúa a señora **Fraga**: Pero hai casos que levan mais dun mes parpadeando continuamente, apáganse...

Continúa o señor **Taboada**: ¿ónde é?

Continúa a señora **Fraga**: En Trasmonte, por exemplo.

Toma a palabra o señor alcalde don **Santiago V. Amor Barreiro** para dicir: Carmen, coméntoche que eu cando vou por aí pola noite, cando veño dun acto, por exemplo, vexo farolas fundidas, non hai material e hai que pedilo, aquí tamén, ten que haber material en stock e ir pedindo a medida que se vai necesitando. Eu teño visto aquí, na praza do concello, que tardaron tres, catro ou cinco días, e había tres farolas. Na rotonda de Bertamiráns había dúas farolas fundidas, repuxeron as dúas e á semana se fundiu a terceira. En todo caso, para que non pase tanto tempo, dicilo, moitos concelleiros me paran e me din pasa este problema.

Continúa a señora **Fraga**: Cando nós estabamos no goberno era un traballo que se facía, de vez en cando revisar, de día, de noite ou cando fora necesario.

Oitava pregunta.- ¿Se está facendo un seguimento de visto e praxe ao finalizar as obras cando as empresas traballan para o concello? o pregunto en vista do que comentei antes da carretera, que xa fai mais dun mes que está así.

Intervén o concelleiro delegado de Vías, Obras, Parques e Xardíns don **Alfredo Taboada Alvelo** para dicir: Si, estamos revisando.

Toma a palabra o señor alcalde don **Santiago V. Amor Barreiro** para dicir: Perdoe que interrompa, incluso moitas veces me traen a firmar documentación para as devolucións de avais e sempre figura un informe técnico.

Continúa a señora **Fraga**: Iso é un problema, se se fai unha devolución de aval e non está como ten que estar...

Continúa o señor **alcalde**: Se vai alí e se emite un informe.

Intervén a concelleira do grupo municipal socialista dona **Isabel González Cancela** para formular a seguinte pregunta:

Novena pregunta.- O local que viña ocupando no Milladoiro a Garda Civil, que agora puntualmente se estivo empregando para a campaña de xoguets ¿se vai ocupar, se vai continuar co alugueiro? porque para estar pechado...

Toma a palabra o señor alcalde don **Santiago V. Amor Barreiro** para dicir: Ese local é propiedade do concello, non pagamos alugueiro, non ten custe para o concello.

Intervén a concelleira do grupo municipal socialista dona **Patricia Conde Lois** para formular as seguintes preguntas:

Décima pregunta.- A última obra de saneamento que se fixo en Agrón, que vai dende Nogais ate a Igrexa, penso que se rematara por maio do ano pasado e creo que había un problema de bombeo nunha aldea. A pregunta é ¿para cando está previsto o inicio do servizo?

Intervén a concelleira delegada de Medioambiente, Desenvolvemento sostible e Sanidade dona **María Eugenia Martín Vicente** para dicir: Cuando tengamos dinero para pagar el bombeo, básicamente, porque como se aprobaron los proyectos sin presupuesto para los bombeos no hay dinero para poner los bombeos en marcha. Estamos presupuestando la inversión que hay que hacer y cuando tengamos presupuesto se hará, hay más que están sin bombeo y sin poner en funcionamiento.

Continúa a señora **Conde**: ¿ou sexa que estades á espera de ter presuposto? ¿pero sabedes xa a canto importe ascende? ¿ou non?

Continúa a señora **Martín**: Lo está haciendo el técnico encargado. Hay varios tramos en esa situación.

Toma a palabra o señor alcalde don **Santiago V. Amor Barreiro** para dicir: Se executou o saneamento e non se fixo a previsión para despois pagar o enganche dos bombeos. Se fas toda a ampliación do servizo e despois non fas o enganche de nada serve facer a obra. A partires de agora o que se esixe ás empresas que fan os proxectos é que cuantifiquen a partida xa para a conexión do bombeo, porque se non ao final facemos unha obra e non podemos usala, ese é o grande problema que nos atopamos.

Continúa a señora **Martín**: Los proyectos de saneamiento aprobados hasta ahora no incluían ninguno bombeo.

Continúa o señor **alcalde**: Hai polo menos tres proxectos que non incluían bombeo, é como se compras un coche e non tes para botarlle gasolina, despois o tes parado.

Continúa a señora **Martín**: Los proyectos se aprobaban sin partida presupuestaria para el bombeo, hay muchos tramos así.

Continúa a señora **Conde**: Pero este caso non incluía o bombeo, creo, porque iso foi un problema que xurdíu despois en obra.

Continúa a señora **Martín**: Los proyectos se aprobaban sin presupuestar el bombeo. Ahora, venía partida presupuestaria para los bombeos en los proyectos, entonces, hiciera falta el bombeo o no, venía reflejada en el proyecto la necesidad de bombeo o no, no había dinero para poner el saneamiento en funcionamiento, y ese problema lo estamos teniendo en varios casos.

Undécima pregunta.- Esta pregunta refírese ao programa de apertura de centros escolares, que non sei que concellería o leva. A principios de ano se iniciaron actividades extraescolares polas tardes nos centros educativos en base á liña de axudas que sacaba todos os anos a Xunta de Galicia. Nese programa se facían cursos de informática, obradoiros de expresión artística e demais. Me consta que non empezaron. A pregunta é ¿cando teñen previsto empezar?

Intervén o concelleiro delegado de Educación, Cultura e Patrimonio don **Alfonso Rey López** para dicir: Nos plans que eu teño está todo en orde.

Intervén a concelleira delegada de Asociacionismo, Igualdade, Muller e Xuventude dona **María González Gómez** para dicir: Penso que iso se pedía dende Mocidade. Este ano íamos falar, coa preparación dos presupostos, con Educación, para que se

leve dende aí, porque estaba un pouco metade e metade, se preparaba entre os dous.

Continúa a señora **Conde**: Eu falo de actividades que levaba Mocidade.

Continúa o señor **Rey** : Polo que me respecta a min, en Educación, que eu saiba se está levando todo a cabo.

Décimo segunda pregunta.- Esta pregunta supoño que terá que ver cos decretos que están pendentes ¿como queda o presuposto prorrogado? porque supoño que haberá conceptos á baixa e modificacións que afectan ao presuposto, tiñan que entrar en vigor e é para ter coñecemento dese presuposto prorrogado, entendendo que forma parte dos decretos que están pendentes.

Toma a palabra o señor alcalde don **Santiago V. Amor Barreiro** para dicir: Posiblemente.

Décimo terceira pregunta.- En relación ao servizo de prevención de drogas, estiven revisando as actas de Xunta de Goberno e decretos e non vin ningunha prórroga ao convenio ¿se vai manter o servizo ou non? porque sempre se acordaba coa Xunta de Galicia a prórroga do convenio a finais de ano, e non me consta ¿está previsto que veña para este ano?

Intervén a concelleira delegada de Mediambiente, Desenvolvemento sostible e Sanidade dona **María Eugenia Martín Vicente** para dicir: Entiendo que si, pero contestaré por escrito porque ahora mismo no tengo los datos.

E non habendo mais asuntos de que tratar o señor alcalde presidente dou por rematado o acto e levantou a sesión ás vinte e dúas horas e cincuenta e cinco minutos do día 12 de xaneiro de 2012, de todo o que eu como secretaria certifico.

Vº Prace
O alcalde

A secretaria